

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Home Minister Pu K. Sapdanga chuan Krismas Urlawk ni a St. Mary’s School, Panigaon, Nalbari District, Assam a Krismas inbuatsaihna tibuai zawnga misualte chetna chu na taka a dem thu a sawi.
- 2. Nimin December ni 28-a Myanmar sipai sorkarin tihluihna a inthlan a buatsaih tum vanga Myanmar sipaite'n Chin state-a Falam township a beihpui an thlak avangin Champhai district-a Vaphai khua-ah raltlan 89 an rawn lut.
- 3. Nimin khan Champhai District NGO-CC hruaituten Champhaia cham mek Adviser to CM (Finance & Planning) Pu TBC Lalvenchhunga chu an inah an hmu a, Champhai hmasawna hnathawh chungchang an sawiho.
- 4. Delhi Environment Minister Manjinder Singh Sirsa chuan Delhi khawpui chhunga boruak bawllhhlawh tihreh nan AI system hman an duh thu leh, hemi atan hian sorkar leh IIT Kanpur in thawhho an tum thu a sawi.

<><><>

CONDEMNATION

Home Minister Pu K. Sapdanga chuan Krismas Urlawk ni a St. Mary’s School, Panigaon, Nalbari District, Assam a Krismas inbuatsaihna tibuai zawnga misualte chetna chu na taka a dem thu a sawi.

Hemi chungchangah hian nimin khan thuchhuah siamin Pu K. Sapdanga chuan Krismas hun thianghlim tibuai a chetna hian a rilru a tibuai-in a tina hle tih a sawi a. Hetiang thil thleng hian India rama sakhaw zalenna leh sorkarin sakhaw tihbik a neih lohna lungphum a kalh tlat a, a na thei ang bera dem tur a ni a ti a, mipui sorkarna ramah hetiang hian hmun a chang tur a ni lo a ti bawk a. Krismas chu inremna hun leh khawngaihna leh lainatna lan chhuahtir hun a ni tiin hnam leh sakhaw hrang hrangte inpumkhatna tichhe zawng leh mite rikrap zawnga chetna thleng chu pawm theih loh leh thil tha lo tak a ni a ti bawk. Assam sorkar thuneitute’n rang tak leh khauh taka hma la nghal a, pawikhawihute man an nih nghal avangin lawmawm a tih thu Home Minister chuan a sawi a. Dan rorelna chuan a tihtur a ti ang a, he pawikhawihnaa mawhphurtute chuan dan angin hremna an tawk ngei tur a ni ang, a ti.

Pu K. Sapdanga chuan mitin leh sakhaw hrang hrang betute chu an nihna inzahsak tawn a, inpumkhat chungah inhriatthiam tawna nei turin a chah a. Remna leh muanna, inlungualna leh inunauna chu hmarchhak bial kaihruaitu leh thupui ber ni reng se a duh thu a tarlang a ni.

Mizoram Pradesh Congress Committee (MPCC) president Pu Lal Thanzara pawhin Mizoram a kum 2025 Krismas hlim taka lawm a nih laia India ram State hrang hranga BJP kaihhruai pawl - VHP, Bajrang Dal leh RSS ten Krismas lawmna an tibuai chu na taka a dem thu a sawi.

Pu Lal Thanzara chuan Krismas lawmna tur cheimawi zawrh an suasam ni a sawiin, chei tawh sa tichhiain Krismas carol te tibuaiin an rikrap nasa hle a ni a ti a. Hei hi Mizoram Pradesh Congress Committee chuan a pawl a tiin a ngai thutak hle a. He tiang thil hi thleng tawh lo hram se, a duh tak zet a ni, a ti bawk. He’ng BJP Wing ti a a sawite hi BJP Sorkarna State-ah an che na bik hle niin a sawi a. Mizoram thenawm Assam State-a Nalbari District-ah pawh St. Mary’s School ten Krismas an lawmna tura an inbuatsaihna zawng zawng pawh suasam sak an ni a. Hetiang hian India ram State hrang hrangah Kristiante rikrap zawngin BJP Wing, RSS, Bajrang Dal leh VHP te hi na takin an che a ni tiin Krismas carol-a kal naupang thlengin an sawisak rawn niin a sawi bawk.

MPCC president chuan India ram hi sakhaw intluktlanna ram tiin chhuang taka sawi thin a nih lai-in BJP ten Sorkarna an chan atangin Kristiante tihduhna hi a kum telin a pung chho a ni a ti a. Nikum 2024-ah pawh khan India rama Kristiante tihduhna hi wawi 834 lai a thleng niin a sawi a. BJP Sorkar hnuaiah India ram hi Secular State a nihna hi a bo tial tial a, Kristiante nekchepna a nasa tulh tulh a ni, a ti a. MPCC President chuan India ram hmun hrang hranga RSS, Bajrang Dal leh VHP ten Kristiante chungah kutthlak a, an zalenna rahbehsak an ni hi a dem tak zet thu leh Kristian zinga kut tuar zawng zawngte a lainat tak zet tih a sawi a ni.

(PR)

<><><>

REFUGEES

Nimin December ni 28-a Myanmar sipai sorkarin tihluihna a inthlan a buatsaih tum vanga Myanmar sipaite'n Chin state-a Falam township a beihpui an thlak avangin Champhai district-a Vaphai khua-ah raltlan 89 an rawn lut.

Raltlan hi thla hmasa ni 28 zan khan Tiau lui kanin Vaphai khaw per Saikhumphai-ah an rawn lut tan a. Anniho hi chhungkaw 11 a mi 47 an ni a Falam township huam chhunga K. Haimual khua ami an ni ber a, a bul hnai khaw thenkhat ami an ni bawk. Tun hnai khan Falam township huamchhung ami tho Hrumhrang khaw mi 42 an lo lut leh a, Vaphai khawtlang hruaitute chuan Fiaratui Middle School-ah an dah khawm a. January ni 7 atanga sikul kai tan

leh tur a nih avangin an dahna hi sawn a ngai dawn niin an sawi. Hrumhrang khua hi Falam leh Halkha inkara awm a ni a. K. Haimual leh Hrumhrang khua-te hi Chin National Defence Force (CNDF) mipui sipai kuta awm lai, Myanmar sipaite’n laklet tuma nasa taka an beihte a ni.

Raltlante’n an sawi dan chuan an khua hi Myanmar sipaite hian indo thlawhna – jet fighter leh gyrocopter bakah drone hmanin bomb nen van lam atangin an bei hmasa phawt a, chu chu lei lam sipai-in an zui ta thin a ni. Raltlante hian an in leh lo, thlawhhma leh an ran vulh zawng zawng an tlansan a, engtin nge an awm tak tih pawh a hre zui tawh lova. Fa nausen leh naupang thahnem tak an rawn tlanchhiatpui a zirna lam leh kawng hrang hranga an hmaabak tur an ngaihtuahin an rilru a hah tak meuh a ni.

Myanmar sipai sorkar hian Chin state-ah chuan nimin khan Tedim leh Halkha township-ah inthlan hi a buatsaih lui a, Thantlang, Tonzang leh Falam township-ah te thla thar ni 11 khian tihlaihna bawka buatsaih leh a tum a. Hemi avang hian vote thlak lo ngam lo tura mipui rikrap na’n leh an tlanchhiatsan Chin silai keng pawlte awp khuate lalet leh tur hian October thla chawhnu lam atang khan Kalaymyo lam atangin sipai tam tak a tir chho a ni.

(Desk)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

GRAVE DIGGING

Nimina Khawbung khuain mitthi an neihah thlan lai mi 300 chuang an thawkchhuak.

Akashvani palaiin a kawmnaaah Khawbung Val upa Pu Liandula chuan thlan lai an tam nachhan chu an khaw Val upa te’n tlangval te chu ko kim takin thlan laia thawkchhuak tura an ngen vang leh infuihna thu tam tak sawi tur a awm vanga nih thu a sawi a. Hei hi kum tawpa thalaite fuihna hun atana an hman thin hun a nih vangte, lal lal lai hun atanga Val Upa nei chhunzawm ta reng an ni a. Tlangval rual hian Val Upate thu an zawm tha-in an thu an awih em em niin a sawi a ni.

Inrinni a Khawbung khuaa mitthi nimina an vuiliam tak hi, Pu PC Lalawmpuia nupui Pi Lalnawnthangi Kum 39 niin Khawbung Dinthar Venga khawsa an ni.

(Corr)

<><><>

CHAMPHAI NGOCC MEETS ADVISER TO CM

Nimin khan Champhai District NGO-CC hruaituten Champhaia cham mek Adviser to CM (Finance & Planning) Pu TBC Lalvenchhunga chu an inah an hmu a, Champhai hmasawwna hnathawh chungchang an sawiho.

Pu TBC Lalvenchhunga hian kum hnih chhunga Champhai District hmasawwna tura sawrkarin sum leh pai a ruahman te leh hmasawwna hnathawh kal lai mekte a lo hrilh a. Chung zingah chuan Champhai khawpui chhung kawngpui la siam that loh siam thatna turin Cheng Vaibelchhe 6 ruahman a nih thu leh kumthar, January 2026 ah thawh tan theih beisei a ni thu a sawi.

Vawiin chhun dar 12:00 hian National Highway No.6 atanga Champhai khawpui luhka, Khankawn to Kanan kawngpui sial zau mek an tlawh ang a, Champhai DC leh PWD hotuten an tawiawm dawn a ni.

(Lalhluipuia, Champhai PTC)

<><><>

Delhi Environment Minister’s Plan

Delhi Environment Minister Manjinder Singh Sirsa chuan Delhi khawpui chhunga boruak bawlhhlawh tihreh nan AI system hman an duh thu leh, hemi atan hian sorkar leh IIT Kanpur in thawhho an tum thu a sawi.

AI System hian khawi atangin nge boruak ti chhe thei thil hi a lo chhuaha a lo awm a hrechhuak thei dawn a, boruak bawlhhlawh leh bawlhhlawh loh a enfiah dawn a ni. Boruak bawlhhlawh siam thei reng reng chu a enfiah vek dawn a. Air quality a vil reng dawn boruak bawlhhlawh zel tur a hre thei ang a, boruak bawlhhlawh zel tur tihfai kawngah a pui thei dawn bawk a ni.

Darkar 24 kalta chhung khan Delhi sorkar chuan in sakna hmun hrang hrang tenau 250 leh a lian 92 an endik a. Kawngpui kilometre 6,000 chuang zeta thui chu tihfai a ni a. Lirthei 7,000 vel chu boruak bawlhhlawh tichhetu an nih avangin pawisa chawitir an ni bakah sorkar chuan mipui complaint 58 a chingfel bawk a ni.

News On Air

<><><>